

四庫全書

子部

欽定四庫全書

子部

圖書編卷十一

詳校官中書臣孫衡
主事臣祁韻士覆勘

總校官進士臣朱鈴

校對官中書臣康儀鈞
謄錄監生臣汪時桂

欽定四庫全書

圖書編卷十

明 章潢 撰

學書敘

仲尼敘書止百篇何其簡也今所存者僅踰半爾然二帝三王設天勤民總之不越乎一中不有以握其至簡之心傳乎矧生於心必發於政事凡以經綸布置禮樂政刑一一皆後世典則所自始以其先得人

心之同然爾雖禪繼述殊沿革損益代變而讀其典謨訓誥命誓則四代規模氣象亦各與世推移要之此中不改也雖然豈特五十八篇均此執中之傳哉譬諸木之曲直短長其形萬殊大匠斲之必以規矩革繩以度其中而後能成其器也彼子史百家又孰能越此心大中之矩哉是故善學書者非求中于書也惟兢業以各全其帝降之衷則書即千古之心印也

書 典 謨 訓 誥 命 誓

孔安國曰孔子討論墳典斷自唐虞以下至于周文
事煩亂剪截浮詞舉其宏綱撮其機要足以垂世立
教典謨訓誥誓命之文凡百篇所以恢宏至道示人
主以軌範也帝王之制坦然明白可舉而行三千之
徒並受其義

孔穎達曰以其上古之書謂之尚書此文繼伏生之
下則知尚字乃伏生所加也

程頤曰看書須要見二帝三王之道如二典即求堯

所以治民舜所以事君

朱子曰欽之一字書中開卷第一義也一經之全體
不外是矣又曰高宗舊學於甘盤六經至此方言學
字又曰書有古文今文古文乃壁中之書今文乃伏
生口傳又曰書有兩體有極易曉者有極難曉者如
盤庚大誥多方多士之類恐是當時召來面命之詞
至于湯誥微子之命君陳諸篇則修其詞命

呂祖謙曰書者堯舜禹湯文武臯夔稷契伊尹周公

之精神心術盡寓其中觀書不求心之所在夫何益
於求古人之心盡吾之心然後可以見古人之心

蔡沈曰二帝三王之治本於道二帝三王之道本於
心得其心則道與治固可得而言矣何者精一執中
堯舜禹相授之心法也建中建極商湯周武相傳之
心法也曰德曰仁曰敬曰誠言雖殊而理則一無非
所以明此心之妙至於言天則嚴其心之所自出言
民則謹其心之所由施禮樂教化心之法也典章文

物心之著也家齊國治而天下平心之推也心之德
其盛矣乎二帝三王存此心也夏桀商紂亡此心也
太甲成王因而存此心者也存則治亡則亂

真德秀曰五十八篇之書無一語不及天無一語不主敬
董鼎曰孔子斷自唐虞迄乎周者蓋以前乎五帝為三皇
世尚洪荒後乎三王為五霸習尚權謫故自唐迄今以定
百篇之書一書之中其於明德新民之綱修齊治平之目
即堯典已盡其要而危微精一四言所以開知行之端主

善協一四言所以示博約之義務學則說命其入道之門
為治則洪範其經世之要也他如齊天運則有羲和之歷
定地理則有禹貢之篇正官僚則有周官之制度修己任人
則有無逸立政諸書煨燼壞亂之餘而宏綱實用尚如此
又曰六經莫古于書易雖始于伏羲然有卦未有辭辭始
于文王耳六經莫備于書五經各主一事而作耳易主卜
筮洪範之稽疑也禮主節文虞書之五禮也詩主咏歌后
夔之樂教也周禮設官六卿率屬之事也春秋褒貶臯陶

命德討罪之權也五經各主帝王政事之一端書則備
紀帝王政事之全體修齊治平之規模事業盡在此書
書以道政事也後儒有指為二帝三王之心學何與本之
為心法達之為治法聖人之實學也書云孝子惟孝友于
兄弟施於有政是亦為政可見政事不獨君相為然凡日
用間何一非政何一非心學哉但善觀書者即政事而得
其心學之精不善觀書者即心學而指為政事之迹試觀
二典三謨非徒允執厥中危微精一堯以是傳之舜舜以

是傳之禹也臯陶益稷所以都俞吁咷于朝堂者不過兢
兢業業維幾惟康之微戒已耳是唐虞之際其君臣相與
有成一如後代師友之諄諄勸勉故朝廷政事皆心學之
精微也以至禹貢祇台德先之言五子逸豫滅德之歌脩
征威克愛克之成就非大禹之心傳哉嗣是而湯誥維皇
上帝降衷下民庶有恒性克綏厥猷維后秦誓維天地萬
物父母惟人萬物之靈亶聰明作元后元后作民父母是
湯武誓誥于征伐莫非此學也然仲虺伊尹之于成湯太

甲傳說之于高宗皆學焉後臣者也觀其制事制心立
愛立敬遜志時敏終始典學之說後先如出一轍所以
太甲克終厥德高宗恭默思道端有自焉推之如箕子
之洪範所云皇建有極亦皆有商家學至于名之旅獒
周之無逆其所告誠於君者一臯陶伊尹之心也所以
成王之顧命謂思夫人自亂于威儀爾母以劍眉貢于非幾
康王之誥謂雖爾身在外乃心罔不在王室君臣之間
亦可謂咸有一德矣若夫大誥以後諸篇皆成王周公所

共事焉曰若涉春冰曰洞淵乃身曰明作有功惇大成裕
曰惟狂克念作聖惟聖罔念作狂立政若止於言政也
曰克知三有宅心灼見三有俊心周官若止于建官也乃
曰作德心逸日休作偽心勞日拙其詳不能備舉傳至呂
刑之德威德明秦誓之斷斷休休而政事之間孰非學也
然則學也政事也一也况總其大旨而敬天勤民不有以
揭書之要乎夫何書之學不明于後世而學專務內不能
見諸行事之實者固不免虛寂之是尚然功名富貴之士

又皆以政事為口實而寥寥千百載凡君臣之圖維未
聞論道經邦以帝王學術相徵戒焉何怪乎世道不唐
虞三代若哉噫學之一字始于說命故曰學于古訓
乃有獲讀二帝三王之書者其思之

讀書大旨

朱子說書綱領
後附先儒說

古史之體可見者書春秋而已春秋編年通紀以見
事之先後書則每事別記以見事之首尾意者當時
史官既以編年紀事至于事之大者則又採合而別

記之若二典所記上下百有餘年而武成金縢諸篇
其所紀載或更歲月或歷數年其間豈無異事蓋必
已具於編年之史而今不復見矣

尚書初讀似於已不相干後來熟讀見堯舜禹湯文
武之事皆切于已

先生問尚書如何看答曰須考歷代之變曰世變難
看唐虞三代事浩大闊遠何處測度不若求聖人之
心如堯則考其所以治民舜則考其所以事君且如

湯曰予畏上帝不敢不正熟讀豈不見湯之心大抵尚書有不必解者有須着意解者有須畧解者有不可解者如仲虺之誥太甲諸篇只是熟讀義理自明何俟于解如洪範則須着意解如典謨諸篇辭稍雅奧亦須畧解如盤庚諸篇已難解康誥諸篇則不可解矣某嘗患尚書難讀後來先將文義分曉者讀之聲牙者且未讀如二典三謨等篇義理明白句句是實理堯之所以為君舜之所以為臣臯陶稷契伊傅輩所言

所行最好綢繆玩味體貼向自家身上來其味自別
問尚書難讀亦無許大心胸他書亦須大心胸方讀得
如何程子只說尚書曰他書却有次第且如大學自格物
致知以至平天下有多少節次尚書只合下便大如堯
典自克明俊德至叅民於變時雍展開是何等大命義和
定時成歲便是心中包一箇三百六十五度四分度之一底
天方見得恁地若不得一箇大底心胸如何了得

二典三謨其言雅奧學者未遽曉會盤庚等篇又難

看如伊尹告太甲五篇說得極切其所以治心修身處雖為人主言然初無貴賤之別細讀極好

書且看易曉處其不可曉者不要強說縱說得出恐未必是當時本意近世解書者往往皆是穿鑿如呂伯恭亦未免此

看尚書漸漸覺得曉不得便是有長進若從頭到尾解得便是亂道讀尚書有一箇法半截曉得半截曉不得曉得底看曉不得底且闕之不可強通強通則穿鑿

盤庚五誥之類實是難曉若要添減字硬說將去儘得然只是穿鑿終恐無益耳

如微子篇且認微子與父師少師哀商之淪喪已將如何若其文義知他當時言語如何自有不能曉矣書中易曉處直易曉其不可曉處且闕之如盤庚之類非特不可曉便曉得亦要何用如周誥等篇周公不過說周所以合代商之意是向當時說話其間多有不可解者亦且觀其大意所在而已

書中不可曉處先儒既如此解且只得從他說但此一段如此訓詁說得通至別一段如此訓詁便說不通不知如何

盤庚篇不可曉如古我先王將多於前功至嘉績于朕邦全無意義又當時遷都更不明說遷之為利不遷之為害何故說得都無頭緒且如要告諭民間一二事做得幾句如此他曉得曉不得中篇又說神說鬼若使如今誥令如此好一場大鶻笑尋常讀尚書

讀得伊訓太甲一德便著晚過盤庚却看說命要之
讀尚書可通則通不可通姑置之

周公不知其人如何其言聱牙難曉如書中周公之
言便難讀立政君奭是也最好者無逸中用字亦有
誇張為幻之語至若周官蔡仲等篇却是官樣文字
必當時有潤色之文

尚書只是虛心平氣閱其所疑隨力量看教浹洽便
自有得力處又曰其間大體義理固可推索但于不

可曉處闕之而意義深遠處自當推究玩索之也

某嘗欲作書說竟不曾成如制度之屬祇以疏文為本若其他未穩處更與桃別令分明便得

與仲默帖云書說未有分付處尚書且須見得二帝三王之心而通其所可通母強通其所難通諸說此間亦有之但蘇氏傷于簡林氏傷于繁王氏傷于鑿呂氏傷於巧然其間儘有好處

荆公不解洛誥但云其間煞有不可强處今姑擇其

可曉者釋之今人多說荆公穿鑿他却有此處若後來人解書則又却須要盡解

東坡書解說著處直是好他看得文勢又筆力過人發明得分外精神問何以失之簡曰也有只消如此解者伯恭解書自洛誥始其文甚閑熟其間之云有難通處否初云亦無甚難通處後方云果有難通處今只是強解將去耳

伯恭直是說得書好但說不通處却一向解去故有

尖巧之病也是伯恭天資大高所以不肯闕疑

後數年再會於衢伯恭始謂予曰書之文誠有不可解者甚悔前日之不能闕所疑也予謂伯恭所以告予者雖其徒亦未必知因具論之使讀者知求伯恭晚所欲闕者而闕之庶幾得其所以解書矣

林書解儘有好處但自洛誥以後非他所解

鄱陽柴氏與尊已程氏書曰唐虞三代聖帝明王與其良臣碩輔精神心術之妙推之天下以為大經大法者

盡在于書嘗謂善言道者必有至不可易之論如詩之思無邪禮之無不敬皆可蔽以一言吾友深于書者必有至要不可易之論願蔽以一言以為讀書之指南程氏答曰讀書必有綱領而提之則其間世變之殊事為之異皆可會而通之一以貫之五十八篇之所載唐虞三代聖君賢相撫世酬物殊時殊事而可蔽以一言者其在于允執厥中乎是中也隨事而有聖賢之於是中也當事而存是故堯舜之禪受堯舜之執中也禹之傳子禹之執中也湯武

之故伐湯武之執中也伊尹之相太甲周公之輔成王伊
周之執中也親如瞽瞍而不克諧以孝則非為人子之中
頑如有苗而不誕敷文德則非格遠人之中君如紂而不
去不囚不死則非微子箕子比干之中水土不平毫不遷
洛不作則非拯民定業之中其他如訪箕子以傳道誅三
監以安周董正治官居喪出誥訓夏贖刑攘戎悔過與凡
修身任賢奉天畏民保治遵法納忠輔道因革廢置寬嚴
久速迹雖差殊理實一致無非隨時順理因事處宜各當

其可各適其宜而已故堯之授舜舜之授禹自執中之外無他語而湯武諸君所以相與扶世立教大抵皆以此中相傳而易地皆然者也此所以上契天心下合民情百世以俟聖人而不惑者也然異乎子莫之執中者聖賢固有精一之功而非徒中之強執也堯舜性之雖不俟于精一而自然能合乎中湯武而下反之則必由此而後造于粹然之地焉以是觀之則知書之要而唐虞三代之宏綱要旨雖不中不遠矣

程氏又答友人問曰前輩謂讀書要識聖賢氣象某謂讀尚書亦當識唐虞三代氣象唐虞君臣交相儆戒夏商以後則多臣戒君耳禹臯戒君儆于未然辭亦不費夏商以後則事形而後正教之如太甲高宗彤日旅獒等篇且反覆詳至不憚辭費矣觀啓與有扈戰于甘野以天子之尊統六師與一強諸侯對敵前此未聞也湯之伐夏自湯誓湯誥外未嘗數桀之惡且有慙德武王伐紂則有泰誓牧誓武成凡五篇歷歷陳布惟恐紂惡不自己心不明畧無

回護意矣伊尹諫太甲不從而放之前此無是也使無尹之志則去鬻拳無幾然太甲天資力量遠過成王太甲悔悟尹遂可以告歸周公則讒疑交起雖風雷彰德之餘宅中圖大之後不敢去國且切切挽召公以同心輔佐用力何其艱也堯以大物授舜舜以大物授禹此豈細事而天下帖然無異辭盤庚以圮于耿而遷國本欲安利萬民而臣民譙譙至勤三篇訓諭而僅濟然盤庚猶可也周之區處商民自大誥以後畢命以前藥石飲食之一為龍蛇一

為赤子更三紀之久君臣共以為至大至重之事幸而訖
於無虞視堯舜區處苗頑又何甚暇而甚勞也精一執中
無俟皇極之煩言欽恤明刑何至呂刑之勝口降是而魯秦
二誓見取于經而王迹熄霸圖兆矣世變有隆污風俗有
厚薄固應如此引而伸之觸類而長之讀書者其毋苟乎哉
婺源滕氏尚書大意序曰書之大意一中字而已先
執厥中書所以始咸中有慶書所以終以此一字讀此
一書迎反而解矣

學書大旨

萬物之生始乎天也萬物之成始乎人也故易謂乾元資始乾知大始凡坤之作成效法莫非天也人道經綸參贊於兩間雖因時以建事也向非聖人繼天立極盡倫盡制而開物成務冒天下之道焉曷能俾萬世永賴小大畢由之哉後人終身率由于先王制作中而莫知其始蓋由學不稽古未嘗考諸虞夏商周云耳古昔羲黃啟運非不有墳典丘索之遺也然

人文初開典制未備如結繩之政茹飲之俗時異世
殊固難盡宜於後之人且洪荒之初其矩矱未必一
一可得而詳紀焉故孔子刪書斷自唐虞訖周末典
謨訓誥誓命各以時敘而別纂就簡揭其宏綱要領
以垂世範今僅存者五十八篇凡大而綱常倫理小
而法制禁令莫非二帝三王心法所流布此所以立
百王之定矩肇萬世之太平也二典開卷即曰稽古
說命曰事不師古非說攸聞曾謂後學而于帝王大

經大法莫能原其所自始哉是故經天莫大乎厯象
日月星辰緯地莫大乎敷土奠高山大川治人莫大
乎建官立政如璿璣玉衡始諸羲和者不可易也則
壤成賦始諸禹貢者不可易也知人安民教養始諸
稷契禮樂始諸堯夔刑罰始諸臯陶者不可易也以
二帝三王其創始有本故也何也曰欽曰敬曰誠曰
忧非徒在乎政事間也言心之始非危微之典乎言
性之始非降衆之誥乎言學之始非學于古訓之說

命乎克明峻德非大學所自始乎精一執中非中庸
所自始乎洪範皇極非無極太極與夫百家言五行
者所自始乎不獨堯舜禹以一中相授受惟四海困
窮之是憂而湯武建中建極以誓告萬方無非永殖
永清以慰民篤后見休之意也不獨伊周于太甲成
王惓惓乎顧諟明命所其無逸雖泰誓亦曰昧昧我
思之惟以求夫斷斷休休之碩輔即此觀之書中一
政一事其所由始皆可法可傳不可勝窮而修齊治

平其根心以發者一而已矣果能以此論世尚友咸得其所自始而反求諸其身則始家邦終四海固不越乎立愛立敬之常而孝友于兄弟則施于有政是亦為政庶乎知始作成之道在我矣否則縱師其迹而不得其經始之原欲鑒成憲以無愆也難矣故于學書之暇輒記其所自始者命之曰原始云

易為文字之祖信矣而文之備曾有備于書者乎彼庖羲畫卦不特洪範之稽疑于卜筮貞悔見易之用

也九疇五行詳言天人之理陰陽剛柔吉凶休咎孰
非易乎詩以言志不獨虞廷賡歌喜起已肇乎風雅
之原五子之歌已肇乎風雅之變而皇極敷言其音
響之協韻者孰非詩乎禮以肅儀度也自伯夷典禮
作秩宗凡五典五惇五禮五庸以至巡狩會同柴望
祭告同律度量衡莫非禮之教也樂以和神人也自
后夔典樂教胄子凡諧和八音出納五言以至祖考
來格羣后德讓鳥獸躋踰莫非樂之教也春秋以肅

紀綱也自臯陶作士命德討罪黜陟惟公然元祀十
有二月之書法即史官以時記事之體莫非春秋教
也周禮以定官職也自唐虞建官惟百夏商官倍周
官公孤論道宏化六卿分職以倡九牧孰非周禮之
教乎明德固闡之於大學也然太甲康誥堯典之克
明顧諟則已先之矣未發之中固闡之於中庸也然
堯舜禹湯文武之執中建中則已先之矣學習一貫
固闡之於論語也然遜志與學習與性成主善為師

協于克一則已先之矣盡心知性固闡之於孟子也
然上帝降東厥有恒性雖收放心閑之惟艱則已先
之矣以此觀之凡聖賢經書不已備于尚書之中乎
且自古帝範相謨皆從此出學必稽古舍此末由志
欲修己治人惟潛神於茲焉亦足矣

邵堯夫以皇帝王霸之氣象譬諸春夏秋冬予讀虞
夏商周之書覩其規模氣象沿襲變態亦何異四時
之相禪乎是故虞之典謨渾然道德性命之府也明

良賡歌喜起千載一遘而百僚師師黎民特雍風動
其殆春日暄妍萬類欣欣向榮之候乎太和在唐虞
宇宙間固於典謨見之也夏書所紀凡九州山川之
源委土田之膏澤物產之孳畜貢賦之等則文景武
衛昭昭乎定為萬世章程得非赤日麗空品彙悉森
然長養於長夏之時乎及讀商書則揖遜變為征誅
典謨變為訓誥嗣君不惠于阿衡則放之桐而盤庚
遷殷乃勤訓誠然後用命雖其發明性學皎如朗月

寒潭然白露橫江已為復霜之景矣若周書則歷數
紂惡以告武成君臣相謂至感風雷頑民不靖屢煩
詔諭終之文侯命而周轍東以訖於秦穆之悔皇王
湯穆之風貌不可復挽矣斯時也閉塞成冬百物斂
藏雖冬日可愛豈無挾續之溫然亦曷勝夫感發栗
烈之威哉故借四時以狀四代亦取其近似云耳且
虞德後世蔑加夏功萬世永賴商君臣賢聖更代迭
興周謨烈耿光惟成康獨盛其書詞渾涵發揚文質

亦各不齊後學發為文詞惡可混然無別也

書首二典何取于典之義乎天秩有典自我五典五
惇哉是典之所由名者一自天叙五倫言之乃萬世
不易之常道也凡經典所記載者記載此彝倫之常
道而後可以典名矣嘗謂堯舜二典其即乾坤二卦
之首諸易乎乾統天坤乃順承乎天而堯即天也舜
紹堯底績其即坤之承天而代有終也故孟子曰聖
人人倫之至也欲為君盡君道欲為臣盡臣道二者

皆法堯舜而已矣蓋君道莫大於欽天尤莫要于為天下得人得人以代天工君道盡矣此堯典所以為君道之至也舜明目達聰孜孜於四岳九官十二牧而庶績咸熙得非無成有終而為臣道之至哉惟其君道之至也凡為君者必取法乎堯巍巍則天而後為君道之典則惟其臣道之至也凡為臣者必取法乎舜重華協帝而後為臣道之典則知此則知二典首尚書者卓乎典常之具在非徒以文章政事言也彼

後世史官徒取一朝之法制禁令布之方策亦名為一代之典章者殆亦沿襲其名而莫知典之所以為典也已

謨之義何謂也即臯陶曰允迪厥德謨明弼諧是也蓋舜禹臯陶益稷羣聖相聚一堂其所謨謀者惟德而已此所以為嘉謨也惟日孜孜而九功之惟叙思日贊贊而九德之咸事危微精一執中開道統之宗勅天時幾克艱肇治統之要其相儆戒也不曰罔游

于逸罔淫于樂則曰無若丹朱傲惟慢游是好傲虐
是作不曰兢兢業業無曠廢官則曰予違汝弼汝無
面從退有後言禹聞昌言則拜陶聞昌言則師此其
嘉謨之在虞廷者信乎古今君臣謀猷之法則也後
世諂諛成風無論已雖有英君碩輔際會一時而惟
幄之中不過運籌決勝之雄圖鋪張粉飾之偉績其
視謾明弼諧惟允迪厥德之是謀者寥寥罔聞已
弟子受業于師必有言教以切磋成就其性行故有

訓之名焉若臣之于君卑高懸隔似不可以訓名矣
然而自古建官有師傅保之名蓋師也者所以師其
道義而訓誨與師弟同如易卦五爻君位也蒙六五
童蒙吉彖曰童蒙求我匪我求童蒙也故伊訓篇曰
伊尹乃明言烈祖之成德以訓於王此訓之所由始
乎謂今王嗣厥德罔不在初乃先之以愛敬親長繼
之以三風十愆終之以善降祥不善降殃無非訓之
以德而饁廸者至矣然太甲不惠則放之桐及處仁

遷義則歸諸毫既復政告歸則陳戒於德是以太甲
三篇與咸有一德雖不以訓名而均為訓體以至祖
己之于高宗躬日召公之旅葬周公之無逸周官孰
非訓迪之體乎蓋惟太甲高宗武王成王能受訓戒
於其師保故萬世而下稱賢聖之君者必歸焉叔季
雖以師保名官而無其實君之體貌日尊既不肯甘
受訓誨於其臣矣不特臣之禮度日卑雖有任師保
之職者孰能如伊尹周召本諸身有之德以陳善納

誨而格乎君心之非哉是故三代以還或形諸論諫者有之若伊訓旅獒無逆諸篇則莫之覩矣又何怪乎君德之不太甲成王若也

誥者告也各隨其事以播告乎臣民反覆曉諭務欲其上下之通徹也以誥名篇者不待論矣商有湯誥仲虺之誥是也如盤庚遷殷誥也西伯戡黎篇祖伊恐奔告於王微子篇序謂微子作誥父師少師非誥歟周大誥康誥酒誥梓材召誥洛誥多士多方蘇子

謂之八誥與康王之誥皆誥也他如君奭篇曰予不
惠惟若茲誥立政篇告嗣天子王矣用咸戒於王呂
刑篇曰荒庶作刑以誥四方非誥與若夏賛征篇亦
云告于衆則謂為誥體當亦無疑即已上諸篇潛心
以紬繹之彼君欲遷都何患乎臣民之不我從者而
盤庚乃反復三誥惟恐德意不下達也頑民弗靖不
殺戮之則遷徙之已爾亦奚用八誥之懸懃哉仲虺
釋湯慙也至誥諭萬邦恐來世以台為口實周公留

君與亦胡為乎告語若此其諄復耶蓋古人處君臣上下寮寀民庶本通為一體無有爾我間隔所以凡有一政一事必使上下人已之允孚而後得以行其志意蓋修辭立其誠由此衆惻怛懲到不違不止此所以為王道也豈若後之人每有示諭不過法制云耳不禁之以刑威則嚴之以誅伐者所可倫哉古者命官必有命辭如高宗之於傅說爰立作相故作說命雖上篇記其命相之語中篇記說之進戒下篇記

說之論學而均謂之命者緣上篇故也嗣是如微子
蔡仲君陳畢命君牙問命以及成王之顧命亦均為
命之體焉然誦其辭究其旨不特說命中朝夕納誨
祗若休命君臣皆非虛語歷觀微子崇德象賢蔡仲
率德改行君陳之孝友畢公之保釐君牙之率祖問
命之匡不及君之責臣皆實意而臣之受命者亦皆
實事宜若末世詢命一出於故套曾不論其才德堪
此命否也又安望其王命之有赫儼然受天明命哉

若夫成王顧命不徒委寄得人允為萬世託孤標準
然其所謂亂威儀貢非幾一皆據其平生之所操存
蹈履者以垂訓嗣王莫非實語實事何為世之豪臣
又承君彌留之際假遺命以擅權也噫以君牙問命
之書尚有以翰林制誥格子視之者孔子刪書之旨
益微矣

誓也者所以一三軍之志而示之以紀律也雖純王
之世兵且不設何有于誓哉然禹誓征苗之師在唐

虞之際已然矣則是天生五材誰能去兵君行六師
何能廢誓故夏有甘誓商有湯誓周有泰誓牧誓魯
有費誓無非於臨陣之先發號令以約束衆心示之
以奉天討罪之意肅之以止齊步伐之法作之以果
毅進攻之勇云耳惟秦誓一篇乃穆公悔過以誓告
羣臣亦因伐鄭敗諸殼而作也即八誓觀之雖仁義
之師必有節制而威克厥愛無敢不恭用命也奈何
世迨春秋列國兵爭每每歃血盟神以相誓而口血

未乾率爾敗盟其視尚書所載之誓又天壤矣讀誓辭者寧不為世道慨耶

書有六體而亦有不盡然者如禹貢洪範武成金縢與五子之歌是可盡以六體拘之乎但書之體雖不同要不越乎史氏所紀錄也古者左史紀言右史紀事禹貢武成金縢得非右史之所紀乎洪範五子之歌得非左史之所紀乎然則書亦史也有謂書以載道史以紀事非歟蓋天下無道外之事亦無道外之道

史不然則書以道政事亦不過政事而已矣何與於
道也是故紀載以本乎道則史即書也事即道也六
體雖分而又有不盡于六體者同歸于道謂虞夏商
周之書即虞夏商周之史亦可也苟如後儒所論徒
有取于史識史才史學三者具長而于道一無當焉
則其文非不工事非不核筆力非不古健雄俊此亦
謂三代以下之史也又何怪經史事道之攸分哉善
觀尚書者雖謂古人經史載籍悉備於書焉亦可矣

何必孜孜于六體之合不合哉

天高地下萬物散殊天體高高在上欲卑與以入萬物也難矣易之大象曰隨風與君子以重巽申命風其天之與乎蓋撓萬物者莫疾乎風雖八風剛柔不齊而疾徐相隨吹噓不斷此所以入物甚微而萬物之生生孰不由天之與入以立其命哉君之於民也亦然何也君之崇高者分也而與乎民者存乎命誥而已是命誥即君之所以風萬民者也故曰君子之

德風重與申命乃君子法天與民之道也義固得諸
易矣乃讀尚書命誥諸體其于一政一事誥諭之間
何諄諄乎不憚煩也不知此即重與申命之實事也
如盤庚之遷殷洛誥之遷洛多方多士之遷殷頑民
詞之重複固不一而足至曰予不敢動用非德曰予
豈汝威用奉畜汝衆曰今予其敷心腹腎腸歷告爾
百姓于朕志曰非我小國敢弋殷命曰非我一人奉
德不康寧君之卑與若此豈假此以干百姓之譽哉

要皆出於中心真誠惻怛自有不容已者故當時臣民莫不翕然風動矣易謂重巽申命不於諸命誥益信之哉何世之君天下者徒知民惟草也不能知風之自又惡能重巽以申命也欲知巽風命誥者盍于易書觀之

嘗謂禹貢奠高山大川凡九州山川如梁岐衡漳海岱淮濟固萬古不易然白壤黑墳赤埴青黎泥塗孰能易其土也上中下錯咸則三壤孰能易其田與賦

也草木篠蕩魚鳥羽毛金錫絲枲元纁孰能易其所出之物產也况觀其導山導水滌源陂澤不可以見水利所自來乎浮汶達濟浮淮泗達河不可以見漕運所自來乎所納銌秸粟米砮丹璣組不可以見貢賦所自來乎島夷皮服淮夷螭珠不可以見四夷職貢所自來乎凡九州輿地所載靡不具于禹貢今猶古也奈何後儒于經中所載山川各以意見言之豈知郡縣雖與九州異名而區域率未之改即九江孔

殷載諸荆可知言及揚州者誤矣三江底定載諸揚
可知言及梁州者誤矣九河之跡其地今猶可考則
知謂碣石并九河淪于海者誤矣陽烏今尚攸居如
故則知疑彭蠡於他郡者誤矣禹貢成于三苗即叙
之後則知謂禹未嘗親至荆揚遣官亦畏三苗不敢
入故荆揚有錯箇者誤矣噫後人每每以意見談經
而不信經即禹貢一篇其餘不可以類推乎聖人之
言雖微上微下然言亦各有攸當不可不知如臯陶

五典五禮天工人代得非統論天人之合一哉然知人安民九德咸事則對禹言也箕子五行五事彝倫攸叙得非統論天人之相通哉然九疇建極稽疑庶徵則對武王言也伊尹顧諟天之明命若人人同矣而慎乃儉德習與性成所以藥太甲焉說命明哲實作則若人人同矣而事必師古學于古訓所以藥高宗焉周公所其無逸若人人同矣而先知稼穡之難乃逸所以藥成王焉是故後人誦讀經典諸如此

類必得其告君之意纔協乎經旨而反躬默契又各有攸當者否則執泥言誼安能有益身心哉

讀典謨訓詁固宜殫心思以繹其旨趣如躬承列聖面命必欲會其精神心術之微而後已然歷代君相所值時勢不齊則其措置幾宜各有攸當宣徒記誦其言論熟績已哉堯舜禹禪授一道益臯陶契列聖際會一時濟濟師師難乎其繼已然其時亦有最難處者如除四凶殄頑讒平水土殺三苗設生當其時

恐未易擔承特善類滿朝無阻隔之患耳湯武時當
桀紂雖堯舜處此詎能遽格其非心乎億兆不堪其
暴虐而解民倒懸望亟雲霓故獨夫授首會朝清明
矧有元聖仁人一心一德凡欲樹勲業于斯時者猶
可勉也若伊周所處則有未易着力者矣何也商周
皆創造之初基圖未固一逢顛覆之君一遇襁褓之
主縱欲諉而置之將誰諉耶閱太甲篇遷桐三年卒
聽師保之訓惟處置得宜故君心速化匪阿衡重寄

其孰能之周公則又不同閱金縢篇初武王不豫請以身代此由我不由人也迨釁起三監流言肆布朝野靡不懷疑既不得不避居東土又不得不破斧東征雖罪人已殄羣疑莫解鶴鳴大鳴王心未釋未聞有一人為之暴白其心迹者向使風雷不動則狼跋東山懼西歸且無日已是太甲之悟繫乎人成王之悟動以天周公不尤難哉彼傳說啟沃高宗召公輔弼成康皆太平宰相事也是故自臯陶益稷謨及伊

訓說命旅獒無逸諸篇俱百代相謨之軌範要皆道
德淵邃出之有本而轉移化導難易尤不可不細心
以體究之苟讀其書不論其世知其人不反求諸心
身則亦章句已爾何益之有

學書大旨總論

多識畜德論世尚友孔孟所不廢也慨杞宋之無徵
傷周籍之已去豈為一代法制云然哉羲畫固為文
字之祖鴻蒙初闢載籍未興故孔子刪書斷自唐虞

而下特存什一于干伯耳典謨訓誥誓命諸體不同
同謂之書總五十八篇一言以蔽之不過敬天勤民
爾已何也天生民有欲無主乃亂固必立之君以治
而教之則大君乃天地宗子也惟天惠民惟辟奉天
而命不于常曷從而稽天命哉天之聰視在民則天
心去留一視乎民而已矣欲為君之肖子敢不敬天
而勤民哉所以堯舜禪受非輕天下以授之匹夫也
典繖揆叙地平天成載在典謨者莫詳焉故揖讓一

天命也堯舜何心也讀典謨而三聖相授受一道可
默會也湯武革命非富天下而奪之君也慰民雲霓
救民水火載在誓誥者莫詳焉故征誅一天討也湯
武何心也讀誓誥而湯武之應天順人者可默會也
且嗣君如啟與太甲成康輔相如益稷伊傅周召啟
沃弼承明良際會班班可考而苟有合乎斯道雖秦
誓亦採而錄之與子與賢宗子家相之說殆于虞夏
商周之書獨觀其深矣故敢以敬天勤民一語蔽四

代之書也非予之臆說也常讀魯論末篇叙堯舜禹之授受則記天之厯數在爾躬允執其中四海困窮天祿永終數語叙湯武之征誅則記萬方有罪罪在朕躬百姓有過在于一人數語孔子敘書之意茲可識矣况敬天勤民原非二事而一念兢業常懷匹夫勝予之微其萬世君相之法程乎噫天人之際甚難言也臯陶謨曰天工人其代之箕子洪範曰惟天陰鷙下民所以發明天人一致之理尤極懇切善降祥

不善降殃又豈徒為君相告耶夫孔子上下二千年
間錄書止此篇章若甚簡矣然言言皆大經大法所
昭垂也故開卷必先稽古而學古有獲學古入官悉
有明徵信乎論世多識莫書若也世儒號稱稽古不
求之書而求之史傳諸子百家上無關於天命下無
補于民生其于尚友畜德何有哉

堯典

嘗謂易大哉乾元萬物資始乃統天孔子以大而贊

矣讀論語大哉堯之為君也巍巍乎惟天為大惟堯則之又以大而贊乎堯然堯之所以則天者雖中心信之猶未有所據也及讀堯典見其欽明之德一天德也時雍之化一天道也欽若昊天厯象日月星辰敬授人時而其則天者其欽天之謂乎至咨四岳舉舜與位然後乃知堯之所以成其則天之大巍乎煥乎蕩蕩難名者其在茲也何也乾資萬物之始坤資萬物之生惟乾能統天惟坤乃順承乎天故羣分類

聚品物咸亨而致役于坤一無成代有終者也則是乾知大始坤作成物雖乾坤合德而乾之所以大者以其有坤道之代終也然則堯之所以大者不以舜乎及讀舜典見其重華協于帝者固本之以元德也然詢四岳闢四門明四目達四聰咨十有二牧舉禹作司空棄為后稷契作司徒臯陶作士垂工益虞伯弔典禮后夔典樂龍作納言以至流共工放驩兜竄三苗而殛鯀皆舜之為也所以九官十二牧各任厥

職時亮天功奮庸熙帝之載而庶績咸熙雖舜亦無為而治也已堯之大不於此可想見耶是故坎離震巽良允之流行莫非乾坤之運用而合德則一歸之于坤禹益臯夔稷契之勵翼莫非堯舜之允釐而協帝則一歸之于舜觀羣聖際會一時堯其乾乎舜其坤乎九官之濟濟師師其六子之迭運乎乾始能以美利利天下而不言所利民固莫能名乎夫堯不偏愛人而為天下得人以廣其愛民亦莫能名乎堯此

天之所以大而堯之所以大所以則天也但大哉乾元至哉坤元夫固天地之自相闔闢者而堯舜明良相遇一皆法天之道也湯之於虺伊武之于周名孰不然哉况堯之試舜必曰欽哉舜咨二十有二人必曰欽哉所以昊天之欽若人時之敬授三謨之祇承祇敬夏書之祇台欽承商周之欽崇天道恭行天罰歷稽諸篇帝王相傳之法本諸此也故章首揭欽明二字不徒足以該四十八篇之大旨而大哉帝堯蕩蕩巍

巍所以則乎天而立萬世君道之極者舍此無餘蘊矣噫終日乾乾夕惕正以崇效天也茲于書之欽明而益信

人心道心

人各自有其心而不自知非心之難知也滯聞見者惑多言昧反身者急默識故於危微存亡間莫之辯焉爾是故古今言心者曰虛靈知覺是也曰人之神明是也然而為善者此神明知覺也為不善者亦此

神明知覺也豈有他哉楊龜山先生曰未言盡心先須理會心是何物未理會得心盡箇甚可見人皆有此虛靈知覺之神而不能反身理會所以真妄混淆自家立命之原終生懵然莫之醒覺此心學所以不容不講也雖然心不萌于不善者不足論縱使見孺子入井而怵惕惻隱此真心也知擴而充者誰與觀齊宣見牛觳觫而其心有所不忍乃曰反而求之不得吾心夫子言之于我心有戚戚焉心學寧容以不

講乎彼舜禹大聖人也舜命禹曰人心惟危道心惟
微訓釋不一大都謂道心天理人心人欲蓋人之生
也有是耳目口鼻之形即有是聲色臭味之欲此欲
固未為不善而不識心者則心為形役虛靈知覺之
神悉從乎耳目口鼻之用其流不至窮人欲滅天理
不已也此人心所以危也道心豈離人而別有一心
哉惟自識其心者為能先立乎大而非禮勿視聽言
動則斯人即為有道之人而其心純乎道也凡耳目

口體之用一本乎虛靈知覺之神淵淵乎退藏宥密
固不可窺而不離聲色臭味實不着于聲色臭味所
欲莫非天理之本然矣道心之微為何如是心一也
自道而言則曰惟微自人而言則曰惟危顧其操舍
何如耳孔子曰操則存舍則亡出入無時莫知其鄉
惟心之謂與合而觀之操而存焉非道心乎舍而亡
焉非人心乎危微係乎操舍而存亡原無二心當其
存也虛靈知覺與道合真雖變通不拘實淵微無朕

斯人也心以道為主則應用莫非道心之發見更何
人心為聽用也當其亡也虛靈知覺盡雜人謀雖未
甚悖乎道終亦危殆不安斯人也靈覺為精魄所拘
知見隨形氣而動亦可執其應用不叛道者謂道心
之聽用哉是以主與用分而二心之說于此乎倡矣
至曰道心性也人心情也曰道心寂然不動人心感
而遂運動靜之分體用之別也又有謂凡言心者皆
是已發故書傳人心道心皆自己發言之遂使務心

學者莫之適從舜孔之心傳終為千古不決之訟矣
嗟夫心為人所同有之心道亦心所固有之道也但
此心既曰虛靈曰神明而于斯道莫之知莫之覺焉
其所謂神與靈者安在也以至神至靈之知覺而百
年之思為盡徇乎七尺之軀殼則心在斯人何勞且
苦一至此哉然亦無足怪也何也此心神靈變化與
生俱生終無終有斂之方寸若惺惺在中徧現兩間
實杳杳莫測非智識可得而揆度非氣力可得而把

持非伎倆可得而窮盡雖勇敵萬夫莫能自遏其一念雖威勢加乎海宇而蕞軀日為游魂攝制或縛荆榛或驅策機宐或甘心無悔焉故偶觸多露天真而晏安盡皆習氣舉天下滔滔皆是良可哀也間有聰穎之士又皆師心自用方其陽明稍勝恍若惚惚潛消不待閃電收光便已流注異象故大章猶致謹諱者此也夫何近之論心學者莫不曰直指本心見

道較之舜孔似為易簡及究其要領不過指見在之成心便為本來面目認眼前之覺智悉皆自性良知即心是道動念即乘敵體承當立躋聖位又有習靜蒲團屏息思慮一旦靈慧內照驚詫本體見前且云得此樞柄入手四面八方一齊穿紐色色信其本來而勿助勿忘活潑灑地造化在其掌控中矣故當今之學非流連光景玩弄精魂便墮體出聰歸虛入寂夾雜二氏援聖經改立名義以自逞其神奇或有矯

流弊者又以此心神明知覺皆不足據一切掃除別立宗旨以標榜門戶亦不免舉一而廢百也多說紛紛于何而折衷之哉噫予過矣予過矣既謂感寂兩心者悖虞廷孔門之本旨又謂直指本心者畧精一操存之真功予何敢執已見論先輩耶嘗稽諸古訓矣文王之心本自順帝則也小心翼翼昭事上帝何為哉武王之心本自配帝命也上帝臨汝無二爾心何為哉孔子心外無矩顏子心外無仁也矩何事于

不踰而不踰何待乎七十仁何事乎不違而不違何
僅于三月哉只此可以識道心矣只此可以見精一
操存之功雖大聖大賢未嘗瞬息懈矣以此反求諸
心而求無負此心之神明亦將無負于先知先覺者
雖狂言勿恤也要之外無心心外無道道即立人
之元人即凝道之具舍亡固衆人之通病操存實入
道之真機所以孔子曰人能弘道非道弘人曰道不
遠人人之為道而遠人不可以為道惟人道盡此心

之神明知覺具在也安得先得我心之同然者以斯道覺斯人哉

朔易

天人生機本有定在也若徒明其理而不識天地生化之原欲反諸已養德養身與天地合其化生之機也難矣是故生生之謂易而其所以生生者何哉一陰一陽是也日陽精也月陰精也易字本取日月相疊而相推明生萬物之所以化生不測者其原在茲

也嘗有得于朔易之旨焉虞書曰申命和叔宅朔方
曰幽都平在朔易日短星昴以正仲冬蓋日月交會
于朔而冬至之朔一歲陰陽之始也傳註謂朔為蘇
因月由晦復蘇取以釋朔之義可也惟不明朔之本
來故謂朔為歲事更易而盡遺其本旨天地生化之
原聖人垂訓之意反因之而晦矣夫東作南訖西成
皆言其方而冬獨謂之朔則朔即北矣舜典東巡狩
至于岱宗南巡狩至于南岳西巡狩至于西岳朔巡

狩至于北岳禹貢東漸于海西被于流沙朔南暨聲
教訖于四海則朔為四方之北無疑也不然何取于
幽都之義也在易卦離為日坎為月坎非正北方之
卦乎日月交會于壬而壬非亥子之間兩日終始之
際乎虛乃北方七宿之中而中星在昴則日不在虛
宿之初度乎可見正北坎位壬子而虛宿所在謂之
朔乃月之本位也每月晦朔之間月到坎位而日來
會之則日月交會名之為朔日魂月魄爻相摩盪陽

神陰精互為吐納此正天地之交構也朔日之名本
諸此晦即幽都而萬象幽暗自此復蘇與易之明入
地中用晦而明其義同知朔則知易矣或曰朔固起
義于日月交會之所矣易之義何取于日月乎哉曰
坎位天地之中化機之根源也惟日月合璧于朔故
相推明生萬古常新四時之溫涼寒暑萬物之生長
收藏悉本乎此易之生生取諸日月之相疊也至顯
明矣繫辭謂陰陽之義配日月懸象著明莫大乎日

月孰非朔易之義乎則是朔也易也聖經不過即天地造化之自然以示人而東作南訛西成皆天地之自然者耳否則朔易止謂歲事更易何為獨曰平在而南訛亦于人為何與哉或曰天地生機本乎日月交構者誠有定在也曾謂人之生機亦自相交構而交構之定在與朔易無異耶曰人心小天地也心藏神離日象也腎藏精坎月象也坎離互藏天地且然況于人乎試自衆人觀之每日念慮經營莫非精神

之發洩及嚮晦入宴息而時方熟寐則耳目悉斂思慮盡忘神入于腎而交乎精魂亦隨神而攝于魄故血氣流貫百脉歸原及將寤則神寓于心既覺則神游于目此則人人皆然非養生家取坎填離之說也惟夜而寐也神入于坎故精得神而愈充斯晝而覺也精煥于離故神得精而愈旺此其故何也天一生水陽也成于地六則屬乎陰矣在人為精成于地而位在坎然其元則生于天一其性本陽謂之元精故

其上與神交于離者乃天生之元會也地二生火陰
也成于天七則屬乎陽矣在人為神是神成于天而
位在離然其元則生于地二其性本陰謂之元神故
其下與精交于坎者乃地生之元會也觀圖書之法象
坎離之卦畫可證矣故水火不相射其體為坎離水
上而火下其用為既濟神藏精精藏神其生生之本
原謂非天人合一之道哉所以邵子曰冬至子之半
天心無改移一陽初動處萬物未生時指點天地化

原莫切于此白沙陳氏曰些兒欲問天根處亥子中
間得最精指點人心樞機莫切于此但言天地而不
合乎人則是為造化之元談言人而不本諸天地則
視為修煉之別術言天地人而不實指其處不免揣
摩臆度卒流為他技矣何不即易書本旨而闡明之
俾後學知所適從哉嗚呼世之人徒知天之神為日
而日與月交于朔莫之知也徒知人之神為心而神
與精交于坎莫之知也雖天地之造化未易悟而人

身之精神試肯審察于寤寐間當即得之矣是以觀
精神交于腎則天地交構愈明觀日月交于肺則人
心交會愈顯但在人一日之夜分即在天一月之晦
朔一歲之冬至天地交而物自生精神交而體自暢
者無二致也然則法天之學如之何曰見離勞坎其
義雖均而坎獨為勞良有深義中庸喜怒哀樂未發
謂之中發皆中節謂之和而下文止承之以時中焉
果能戒懼于不覩不聞而極深藏密以立大本則勞

朔易之妙當自得之

伯夷典禮三

清

直

寅

帝曰咨四岳有能典朕三禮僉曰伯夷帝曰俞告伯
汝作秩宗夙夜惟寅直哉惟清伯拜稽首讓于夔龍
帝曰俞往欽哉

三禮

禮者理也天理之在人心一而已矣天下無二理宜
乎禮亦無二也然古今之言禮者曰修五禮曰五禮
五庸曰百禮既至曰經禮三百曲禮三千禮何若此
其繁哉要不越乎吉凶軍賓嘉五者而已矣辟之水

焉江河必有源也其流千支萬派皆江河之委也不
知禮之散殊者日泳游于江河而昧乎水之流不知
禮之一本謂其能窮水之源也奚可哉嘗讀虞書帝
曰咨四岳有能典朕三禮或曰三即五之誤也或曰
三者天地人也使于本文無所指謂三為五之誤可
也謂三者天地人亦可也獨不見帝曰俞咨伯汝作
秩宗夙夜惟寅直哉惟清之言乎然則寅也直也清
也三者即伯夷之所典者也孰謂寅直清之非禮乎

天高地下萬物散殊析其條理至纖至悉雖萬端不足以盡之人徒狃于舊見舊聞而有指寅直清為三禮者鮮不以謬妄訾之矣殊不知人之一身自獨居一室以至于大庭廣衆自刑于妻子以至對越天地神明自灑掃應對以至作止語默周旋曲折何一非禮何一非天理之節文也使不寅則怠惰矣曾有怠惰而可以為禮乎不直則邪僻矣曾有邪僻而可以為禮乎不清則雜亂矣曾有雜亂而可以為禮乎果

知天理在吾心而舉動之間一循乎天則自夙至夜不怠情則寅寅即禮也不邪僻則直而直即禮也不雜亂則清而清即禮也試自一物觀之緩則未有條理不肅然者急則條理亂矣直則未有條理不截然者枉則條理混矣靜則未有條理不秩然者躁則條理淆矣知此則寅直清為三禮可無疑也况合是三者乃人心固有之天則不待安排不待矯飾隨所感觸而森然發見大之而五典五禮析之而三百三千

度雖雍容寅則一也儀雖曲折直則一也文雖煩縟
清則一也何也人心本寅人心本直人心本清凡由
衷達外條理不紊莫非自然之禮也或者又以吉凶
軍賓嘉各有所宜禮儀威儀各有其等苟以寅直清
為禮焉則儀文度數可盡廢也耶噫是則逐于儀文
度數之末而不識其本矣孔子曰人而不仁如禮何
曰禮云禮云玉帛云乎哉正以儆世之逐末者觀其
大林放之間可知也易曰嘉會以合禮曰會通以行

其典禮記曰無體之禮曰至禮不讓而嘉會會通無體不讓不有出于儀文度數之外者乎可見寅直清禮之本也吉凶軍賓嘉禮儀威儀禮之文也本與文不相離而五典五禮三百三千莫非寅直清之所如記曲禮必首之以毋不敬也嗚呼人苟知寅直清三者為禮則三即五之誤三指天地人皆疑所不必疑釋所不必釋彼區區于器數儀節之辨别者皆非所急而禮之本可識矣

禹貢疑議

仲尼刪書止存百篇皆存其可信且可為後世法也禹貢載在聖經傳來舊矣信聖經者宜據古考今不宜因今之異同以疑古也何也地一也或以名而殊名一也或以時而改所以古今不盡同而其沿革不可盡考矣因其不可考也即致疑禹貢可乎禹貢曰彭蠡既豬陽鳥攸居三江既入震澤底定又曰嶓冢導漾東流為漢又東為滄浪之水遇三澨至于大別

南入于江東匯澤為彭蠡東為北江入于海又曰岷山導江東別為沱又東過於澧過九江至于東陵東迤北會于匯東為中江入于海又曰岷山之陽至于衡山過九江至于敷淺原是長江原委并禹之導江所載亦甚詳矣以禹貢之文考諸今日之地勢其能以盡同乎是故言九江則以今日之九江府當之蓋江分為九既無間斷之殊江漢水匯為彭蠡亦無倒入湖口之勢有如朱子之所辨者且緣此遂謂大禹

未嘗身履梁雍荆揚地止分遣官屬往視况洞庭彭
蠡之間乃三苗氏所居當時水澤山林深昧不測方
負其險阻頑不即工則官屬之往者未必遽敢深入
其境是以但見彭蠡之為澤而不知其源之甚遠而
且多但見洞庭下流之已為江而不知中流之常為
澤而甚廣也以此致誤宜無足怪是因今日之地名
疑禹貢之錯誤其果然與又引鄭樵謂東匯澤為彭
蠡東為北江入于海十三字為衍文是又因後人之

說疑禹貢之宜刪也已試以九江郡與彭澤縣之有
可考者言之山海經言廬江出三天子都入江彭澤
西水經言廬江出三天子都北過彭澤縣西北入江
已與禹貢不合漢之廬江郡即今廬州安慶地故不
在江州潯陽本以蘄之潯水得名亦不屬柴桑縣漢
九江郡本在江北而江州實武昌郡之柴桑縣後以
江北之潯陽并柴桑立郡又自江北徙治江南晉安
帝義熙八年始省潯陽入柴桑縣其後唐又改柴桑

縣為潯陽縣然則今之九江郡且非漢晉時九江矣
況禹貢之九江耶惡可據今之九江以潯水中洲渚
之間隔而并疑經文也所謂三江既入震澤底定或
指彭蠡為南江以足經文中江北江之數故與震澤
不相關或謂三江宜求之上流如郭璞山海經註岷
山大江所出也岷山南江水所自出也岷山北江水
所自出也三江皆發源于蜀注于震澤故禹貢紀其
原及其委耳若只據其地名求之周禮職方氏云揚

州叢曰具區川曰三江則周禮距禹貢特千餘年而具區已異乎震澤之名矣矧今之太湖又異乎震澤具區之名耶或又指巴陵為東陵指洞庭為彭蠡要皆出于臆度之見以數千年之後求合數千年之前陵谷變遷安得一一悉如故也經文前云彭蠡既豬則其自豬為澤明矣後云東匯澤者今每歲春夏江漢水漲則湖口倒流入彭蠡以上達豫章郡孰謂經文之果誤哉噫禹貢傳來舊矣繪畫天下山水田賦

為萬世不刊之典九州山川各有分疆觀三江既入
載之揚州則知求之上流者非也觀九江孔殷載之
荊州則知郡名江州而求其跡于湖口者非也觀三
危既定三苗丕叙載之雍州則知洞庭彭蠡之間為
三苗所阻不知作禹貢時三苗皆已懷服而遣官之
說其非尤甚觀漢為北江江為中江則鄱湖為南江
可不言而喻矣故曰信聖經者宜據古以考今不宜
因今之異同以疑古也至云禹貢錯誤云十三字行

文當刪則吾豈敢

洪範九疇圖

初	五行 木曲直酸	水潤下鹹 火炎上苦
一	敬用五事	貌恭肅 言從乂
二	聽聰謀	視明哲
三	農用八政	次 貨祀
四	次 歲	司空 司寇
次	協用五紀	次 土稼穡甘
七	次 雨 霽 蒙 占 悔 繹	火炎上苦 土稼穡甘
八	次 念用廣徵 陽 休 乂 甫 急 聖 蒙	水潤下鹹 火炎上苦
九	次 養用福極 富 健 好德 貧 考終命 弱 反之福	水潤下鹹 火炎上苦

嘗讀洪範見武王之所訪箕子之所陳俱在彝倫攸
叙然疇雖有九而其旨要則惟水火金木土五者而
已矣何也彝倫攸數而帝不畀鯀以洪範九疇者以
其汨陳五行也天以洪範九疇錫禹而初一日五行
則五行謂非九疇之大綱乎雖于初獨不言用下文
八者俱以用言非五行獨無用也蓋以下文所云用
者皆用此五行也九疇只此五行夫固所以陰陽下
民而為治天下之大經大法所謂彝倫之攸叙叙此

焉耳是故惟五居中不以數言五事五紀庶徵五福
則皆五也政雖八也食貨祀賓師統于三官而八政
非五與德雖三也正直一而剛柔之克各二三德非
五與稽疑雖七也卜兆五而其占則用二稽疑非五
與至六極則皆五福之反也但五行在天地間凡萬
事萬物莫非自然之運用而用之者則各有攸當耳
所以敬用五事即五行之本諸身而罔弗欽也農用
八政即五行之施諸民而農為先也協用五紀即五

行之合乎天而罔敢悖也建用皇極即五行之一于中而端表則也又用三德即五行之矯其偏而從乎正也明用稽疑即五行之各兆而慎所擇也念用庶徵即五行之各有徵而可自省也嚮用五福咸用六極即五行之禍福在人所自取也可見皇極居中固有以握乎九疇之樞五行在初實有以統乎九疇之用是五行不言用而天下萬世大經大法雖欲越此以為用焉不可得矣况箕子之所陳者乃千古聖學

之傳故建極在上會歸在民王道蕩蕩平平本人人所當率由而天人貫通之理亦人人所當會歸焉者循此則彝倫叙悖此則彝倫斁矣可不慎哉至以此揆之洛書載九履一左三右七二四為肩六八為足而五居中于義本無所取但其所同者五行也一六水二七火三八木四九金五十土是水火木金字在洛書謂之九數而天地萬物之數管是矣在洪範謂之九疇而天地萬物之用管是矣諸儒不知五行乃

洛書洪範自然孚起之妙必欲以疇強合于數焉何哉且洛書自一至九其奇耦方位各有定在洪範自初一至次九不過九疇之綱耳果何以見其初一五行三八政之類皆為奇次二五事四五紀之類皆為耦初一五行方位當在下次九五福六極方位當在上八政當在左五紀當在右洛書之數九而洪範何為于初一即曰五行次二乃曰五事次三乃曰八政其數皆雜亂而不循其奇耦方位之叙也雖曰天乃

錫禹洪範九疇原未指為洛龜何為即以洪範之九疇配洛書之九數以其言列其位且衍之八十一章馬果洛書也果洪範也止因其同一九字而必欲一同之又何怪其愈傳而愈訛耶況禹既因洛書以叙疇矣或謂先天卦取則洛書又有謂後天卦取則九疇果天已錫之伏羲復錫之于禹果伏羲已先禹而為之書禹乃後伏羲而為之疇果禹先文王而叙之為九文王後禹而列之為八果禹先箕子而為之

範箕子後禹而衍其說耶諸說紛紛皆劉歆之說誤之也要之道一而已矣得其意則殊塗而同歸否則道本一而見則二惡足以窺聖人之學

貌恭肅

水潤下

時雨

皇極

言從火

火炎上

時陽

視明哲

木曲直

時燠

五福

之建

聽聰謀

金從革

時寒

思睿聖

土稼穡

時風

貌不恭狂

水不潤下

恒雨

皇極

言不從僭

火不炎上

恒暘

視不明豫

木不曲直

恒燠

六極

不建

聽不聰急

金不從革

恒寒

思不睿蒙

土不稼穡

恒風

五行在天五事在人天人一體而人之用五事即所以用五行也用一也敬則皇極建不敬則皇極不建而休徵咎徵隨之矣使于五事之用而五行配屬不清于何而用之于何而驗之哉嘗考諸古反諸身因以詳究洪範之說焉木貌火言土視金聽水思此孔劉傳疏舊說又增咎以眊增罰以陰信未然也蘇允明乃謂木貌金言火視水聽而土思子由又謂土貌金言木視水聽而火思其信然乎至蔡傳出而其說

始定然天人之際終有未易明者必先明乎天地之
生成斯人道可識也天一生水地二生火天三生木
地四生金天五生土雖其生理備具而天地不合則
不成也故地以五合一而水成天以五合二而火成
地以五合三而木成天以五合四而金成地以五合
五而土成此五行之所以生且成者天地陰陽會合
而渾闊無窮者也水生于天而行于地故其性潤下
于易象取水在天上水行地中而浮游天地皆水也

火生于地而運于天故其性炎上于易象取明入地中火在天上薰灼天地皆火也周易首乾坤終坎離既未濟天地定位水火不相射又謂雨以潤之日以暄之是也天三生木所以木皆發榮向上其性曲直資水以生其位東方而條達舒暢者其出機也地四生金所以金皆堅實沉下其性從革賴火以變其位西方而嚴凝肅殺者其入機也天五地十陰陽萃合為土萬物莫不資之以生以成而止曰土爰稼穡特

舉人之養生最切者言之而土乃天地之冲氣也是
天地開闢莫先乎水水濕生燥火燥生潤水滋木生
木為火母火燥金變水為金子燥濕融結而土為水
火木金所附五行生成變化不可窮詰其理則不可
易也其在人也有形即有貌以貌屬木者取其氣之
生以貌屬土者取其形之成不知生成之原在易曰
男女構精萬物化生太極圖曰無極之真二五之精
妙合而凝而人生焉有生之初氣以水而聚形以水

而結有生之後周身血氣之運莫非水也貌非人之水與甫生之際即有聲聲氣發露神之昭也天有震以著其陽之動人有言以宣其心之聲觸之即發出悖來違條起條滅亦無定象燭火燎原片言喪邪言非人之火與諸家每以心腎為神氣之會者亦有見于腎中水精氣所由生顏色之光澤係乎腎水之周流故腎為形色之本心固神明所舍而心主乎舌故聲音之發皆根于心也木于時為春其氣散在人為

魂在目為視故以視屬木金于時為秋其氣收在人
為魄在耳為聽故以聽屬金易謂精氣為物游魂為
變木外榮視外見魂外游類也金內鑑聽內受魄內
守類也彼謂金有聲而屬諸言者固未識內外出入
之義抑知金以火而革聽以言而變與土爰稼穡屬
之恩者人賴五穀以養生內經曰脾胃者倉廩之官
五味出焉又曰在地為土在臟為脾在味為甘在志
為思思傷脾胃為一身之統思為五官之主也非與

五行具于人即其運于天也明矣其用之人也又豈
天人不相孚也耶水即雨而莫不潤者其德也故貌
之德恭而作肅為水之用焉潤身生色謙退下人所
謂抑抑威儀維德之隅是也肅則時雨而休徵反此
為狂則恒雨而咎徵矣火即暘而莫不炎上者其德
也故言之德從而作火為火之用焉發禁躁妄出遠
鄙倍所謂出其言善千里之外應之是也火則時暘
而休徵反此為僭則恒暘而咎徵矣木氣燠而曲直

四達仁德也故視之德明而作哲為木之用焉離明
外施旁燭無疆四目明而無不照也哲則時燠而休
微反此為豫則恒燠而咎徵矣金氣寒而從革歛藏義德
也故聽之德聰而作謀為金之用焉聲入心通許謨遠猷
聰四達而無不納也謀則時寒而休徵反此為急則
恒寒而咎徵矣土氣宣播為風猶人之大而化焉之
謂聖也故思之德睿而作聖為土之用焉通微生于
思至黃中通理神明昭融哲謀肅乂無所不用其極

所以聖則時風而休徵反此為蒙則恒風而咎徵矣
但其用有五其敬則一維敬則平康正直剛柔得中
而皇極建斯為五事之得而休徵五福應之不敬則
剛柔偏而皇極不建斯為五事之失而咎徵六極應
之若曰某徵某福某極應某事焉拘滯穿鑿如劉向
之說則非矣是故皇建其有極斂時五福用敷錫厥
庶民究其實不外乎敬用五事之至也此固攸叙彝
倫之要天人之大範也初一日五行而八者之用皆

用此耳五行寧無敬乎哉

學于古訓

學訓不明則邪說興譏行作而國家之政治日益頽壞學之所係亦甚鉅矣嘗讀學記曰博習親師曰離經辨志曰敬業樂羣是窮經博古得非自昔學術所重耶何近之談學者謂心性外一切詞章記誦皆聖學之榛蕪不知人心自有仲尼六經皆我註脚苟醉心糟粕惡足以語身心性命之淵微哉此言學而不

究夫大學之所自始故多言得以惑之耳書始唐虞而學之一言則始諸說命謂學于古訓乃有獲凡後之言學者悉本諸此且曰事不師古匪說攸聞曰監于先王成憲其永無愆莫非學古意也孔門以學立教論語二十篇雖各因人而施然學詩學禮學易學文孰非好古敏求之源流哉以孔門稽諸說命似亦後先一揆矣雖然說之言蓋有為而發也須合三篇以會通之庶乎得其學之全焉何也恭默思道非高宗

之學乎舊學于甘盤非即默思之謂乎說蓋懼其專
於思而廢大學一於默而畧乎事也啓心沃心闡德
輔德高宗之望傳說者真不啻大旱之望霖雨而傳
說弼直高宗惟在事事有備無患如甲冑起戎干戈
省躬啟寵納侮爵德任賢諱諱于政事間欲以瞑眩
之藥瘳厥疾焉故終始典學遜志時敏必如此而後
道積厥躬德修罔覺也不然則時惟建事而事不師
古幾何而不師心以自用哉然知行合一學之則也

說又專于力行之艱何也知之日明哲明哲實作則羣臣固已信王實有此知矣蓋道咸得諸恭默之思則不患其聰明之不啟識見之不徹也故曰知之非艱行之惟艱孰非豫防其偏而望其知行思學之合一乎信乎學不思則罔思不學則殆而恭默以思道者不得不學古以稽其實必先明諸心以知所往然後力行以求其至而明哲實作則者不得不慎行以履其祥此所謂古人之全學也否則一于博古者不

免涉于支離一于恭默者不免流為虛寂故曰說之言蓋有為而發也

祖甲帝乙

經以載道史以記事前人有定論矣然道外無事事外無道經史可以事與道分言之哉春秋魯史也其事齊桓晉文其文則史一經聖人筆削遂成性命之書此其事之所以在即道之所以在可傳可信為萬世紀事之宗也尚論三代以前經有殘缺考諸史史有誣

雜折諸經可也茲于祖甲帝乙深病史之不可憑矣
幸而有經存焉蓋書乃聖經所以道政事者也無逸
篇周公陳以訓導成王而歷舉商王之無逸者有曰
其在祖甲不義惟王舊為小人作其即位爰知小人
之依能保惠于庶民不敢侮鯀寡肆祖甲之享國三
十有三年及讀少微通鑑曰祖甲嗣立為人淫亂殷
衰在位凡三十有三年而崩將以為兩人也則名同
享國厯數同及考邵子經世書凡世次厯年亦無不

同者將以為一人也何以一治一亂一賢一不道其
相懸一至此耶且無逸之書周公舉以告其君孔子
取以筆諸經可信可傳無踰此者史遷尚以祖甲為
淫亂而妄加詆毀向非無逸之篇則祖甲之誣將終
于莫之白而至有疑祖甲為太甲者是史以記事其
于事之是非真偽且不可憑則又何有于道哉又嘗
誦易于泰之五爻曰帝乙歸妹以祉元吉歸妹五爻
亦曰帝乙歸妹吉易三百八十四爻實舉其人者甚

鮮而于帝乙則兩及之雖歸妹之禮或始于帝乙而元吉之占各因其卦爻然苟非賢君周公於易爻何為屢以名號稱也按書之多士篇曰自成湯至于帝乙罔不明德恤祀左傳晉趙鞅救鄭筮遇泰之需曰微子啟帝乙之元子也春秋去古未遠且其言即為泰九五而發亦有可據何京房傳乃有湯歸妹之辭荀爽對策張說作銘皆因之程傳則以史謂湯為天乙厥後有帝祖乙皆賢王也後又有帝乙未知孰是

夫書稱帝乙有明德及考史鑑所載則云帝乙商道
益衰將信載道之經乎抑信記事之史乎信經則書
與易合信史誠不免程傳之疑矣夫易書所稱帝乙
祖甲皆周公所表章也二王必為商之賢王無疑況
商王多以十干為名取乙之名者五曰天曰祖曰小
曰武曰帝其世次各異何為不直信易卦爻所稱本
帝乙也而反以天乙祖乙之相混以甲名者五曰太
曰小曰沃曰陽曰祖亦世以名殊何為不直信書無

逸所稱本祖甲也而反以太甲之相清雖然經史中或帝乙原無可考疑為天乙可也而載諸多士者至明顯矣傳易者不之信而祇信緯書與京氏之說或祖甲原無可考疑為太甲可也而載諸無逸者至明悉矣傳書者不之信而祇信帝紀與孔氏之說焉則是經且因傳而淆之矣又何怪史遷詆誣祖甲帝乙而後世莫之辨哉噫傳稱夏后孔甲擾于有帝且有盤盂之戒而史遷亦謂其淫亂不道今雖欲辨之其

如文獻不足徵何

康誥

嘗讀大學首條三語已足以括其要矣然四引康誥以證之曰克明德曰作新民曰如保赤子曰惟命不于常固足以盡大學之義而康誥一篇謂不盡于四語中乎可見古人善言書亦可見後人讀書不能窮其奧而揭其要也然考康誥所由作在書序則曰成王既伐管叔蔡叔以殷餘民封康叔作康誥酒誥梓

材書傳則曰武王封康叔于衛乃作康誥酒誥梓材以命之若果以為成王時作也然篇中所稱如朕其弟顯考文王乃寡兄易適乃文考既曰考曰兄曰弟其必非成王詞也明矣或謂誥作于周公而稱弟者周公弟之也豈有王若曰益侯朕其弟而可為周公之稱乎此必武王命康叔之詞而序之誤也無疑矣或又以為武王時康叔尚幼故未就封然篇中有曰朕心朕德惟乃知曾謂知武王之心德者尚可以幼言

之乎但其文拳拳于明德慎罰中有助王宅天命矧
曰其尚顯聞于天無作殄等語不類封國之誥也嘗
按春秋傳定公四年祝佗曰武王克商成王定之周
公相王室以尹天下命伯禽封于少皞之墟分康叔
命以康誥封以殷墟又曰周公為太宰康叔為司寇
即此以意度之或者即康叔為司寇而命之以是誥
與以命司寇之誥為封國之誥或者因康叔之國在
殷地而後人誤傳之與但斯言也亦因康叔為司寇

之言而言之耳雖左氏去周盛時未甚遠其言或亦有據而未敢必也噫若果信以為司寇之誥匪特與明德慎罰之文不相悖而封國在司寇之後則書傳與祝佗之言皆可意會矣特外此別無可考則亦安敢信以為然哉

洛誥君陳畢命

粵稽古帝王其德澤入人之深淪肌浹髓固結而不可解此豈刑驅勢迫威力劫制之哉抑豈沾沾之惠

煦煦之恩能使人皆帖然服之易世而不變哉嘗于書而深有感夫殷周之際焉自讀泰誓牧誓武成諸篇見武王一戎衣有天下凡殷之子孫臣庶靡不臣服于周矣武王定鼎于洛志在都洛故并殷民遷之宜其感化之易易也迨成王命召公相宅于洛作召誥惟誠于小民顧畏民曷真知本哉周公往營洛邑使來告卜作洛誥乃命周公留洛固以東都重地不得不賴公之鎮定之亦以殷人不靖非周公不足以

輯寧而化誨之也然于多士多方則又誥戒之不已
曰昔朕來自奄于大降爾四國民命我乃明致天罰
移爾遐逖比事臣我宗多遜曰爾曷不惠王熙天之
命爾乃廸屢不靜是殷人之不心服者何若此其難
變哉繼命君陳懋昭周公之訓且曰爾無忿疾于頑
可見殷頑尚未之改也至康王命畢公保釐東郊必
殷頑民猶以餘風未殄將由惡終為言必既歷三紀
然後世變風移是其壯者老矣老者死矣故其民之

頑者始咸若於周王之訓也夫民一也在周為頑在
殷不謂之忠乎蓋由湯至武丁賢聖之君六七作天
下歸殷久矣久則難變也况賢聖繼世迭興雖烏獸
昆蟲草木莫不浸潤於膏澤中矣斯民醉飽先王之
德宜遽忍于畔商哉特苦受毒逋不得不望周以解
其倒懸耳及暴虐既除謳吟思商又何日忘之哉固
非區區勢力所能脅又豈旦夕惠澤所能轉移而心
服之哉殷先哲王其德澤入人深也如此然周於頑民

宜乎以刑威驅迫之無難矣乃由商舊政且表厥宅
里樹之風聲舒徐以待其自新自化故曰惟周公克慎
厥始惟君陳克和厥中惟公克成厥終三后協心同底于
道俾太和在成周宇宙間豈一朝一夕之故哉是故觀
于商而知民之沒世不忘以王澤之入人深也觀于
周而知民之必世後仁以王澤之感人漸也惟其漸
也此其所以深也志王道者盍于洛誥君陳畢命而
玩味之始知後世君天下者迥與三代別矣

穆

王

書

君牙 命君牙為大司徒

冏命 命伯冏為太僕正

呂刑 命呂侯以刑

穆王三書

穆王周賢君也後儒信雜說而不信聖經乃誣之以
耄荒何哉昔孔子定書自周成康之後獨存穆王作
君牙伯冏呂刑三書用人訓刑俱不墜文武成康之
風烈謂之為賢君也諒非溢辭矣及觀韓退之作徐
偃王遺碑乃曰偃王凡君國子民待四方一出于仁
義時周穆王無道意不在天下得八龍騎之西遊宴
王母于瑤池歌謠忘歸四方諸侯之爭辯者無所質

正咸賓祭于徐執三帛二生之物于徐之庭者二十
六國穆王方且復命造父御長驅而歸伐徐偃王北
走嗚呼如退之之說則夫子所存三書皆可廢矣孰
知是說也倡之者列子和之者左氏信雜說而不信
聖經退之不得逭其責也夫乘八駿而宴王母列子
之說也謂西極之化人請穆王同遊王執化人之袂
騰上乎中天既而王悅不恤國事肆意遠遊乃至巨
蒐氏之國又升寃裔之墟以至于瑤池此但列子假

訛謬妄之言以彰其神仙之術與黃帝不親政事夢
想華胥之事同莊列寓言大段謫怪多類此厥後左
傳不察乃因其說曰穆王欲肆其心周行天下皆將
有車轍馬跡焉妄者又作穆天子傳以廣其孟浪之
說此退之所為據也夫以列子謂穆王好神仙不恤
國事為可信則黃帝不親政事亦可信耶以穆王宴
瑤池為可信則黃帝至華胥國亦可信耶且列子謂
西極化人既以變物之形又且移人之慮又為王問

所從來左右曰王默存耳化人亦曰吾與王神遊也
形豈動哉夫既謂之默存謂之神遊而遂謂其乘八
駿宴王母不親政事信以為實雖莊列寓言之意亦
弗之察矣但韓子亦因文見道者至謂偃王能行仁
義穆王伐之不益謬哉夫有周王在上偃王乃敢斷
諸侯之辯爭受列國之王帛恐知仁義者不為也況
信怪誕之說而違夫子定書之旨因徐偃之偽而使
穆王受耄荒之誣是可以弗之辯哉其命君牙為大

司徒則自謂守文武成康遺緒其心憂危若蹈虎尾涉春冰必賴股肱心膂為之翼也其命固伯為太僕正則自謂怵惕惟厲中夜以興思免厥愆至有僕諫厥后自聖之言非惟見其所任尹牙伯固為得人而惕躬畏咎亦甚切矣其命呂侯以刑也則歷告以謹刑罰恤非辜年雖耄耄而一念哀矜欽恤之誠見于言表反謂其意不在天下何耶向使穆王三書所言皆無實所任之人皆不當在夫子必不取之以垂訓也

夫子存其書則君才伯同呂侯必非妄人穆王必非
不恤國事之主也明矣當是時君臣若此謂徐偃僭
王已謬况又受諸侯之贊乎何後儒因伯同為太僕
正則曰穆王好馬故也因呂刑王享國百年耄荒則
曰老而怠荒故好遊也所以書傳謂穆王巡狩無度
財匱民勞至于末年為一切權宜之術以斂民財夫
子錄以示戒是惑之愈甚而愈失其真矣盍即書之
本文而玩其旨乎書曰王享國百年耄荒度作刑以

誥四方蓋荒度之義與禹貢荒度土工同言年雖老
耄猶荒度作刑以誥四方正見其不敢怠也至謂宏
敷五典式和民則爾身克正罔敢弗正民心罔中惟
爾之中誦斯言也穆王之命誥與吾夫子垂訓之意
昭然如日星也後人徒信雜說而不信聖經何哉

秦誓

昔者孔子刪書而終之以秦誓嘗竊怪焉或以為周
衰而秦興孔子固已先見其微而于叙書特錄之也

噫聖人之心至公無我豈逆料于數百年之後而以事功成敗論哉及觀秦誓一篇則見穆公悔過遷善懲至惻怛若禹湯罪已有汲汲乎其不暇者至其昧思一介之臣以斷斷無枝休休有容為賢而以斯人為子孫叢民之利其媢嫉者反之此尤可為千古之龜鑑春秋戰國諸君慮未有及此者也然則如繆公者聖人惡得而不與而秦誓一篇聖人惡得而不錄聖人取舍予奪垂鑑萬世豈苟私一繆公而已哉故

論五霸之功則大齊桓以其首能率衆尊周而攘夷也論五霸之德則取繆公以其獨能自反悔過而遷善也知夫此則堯夫特稱秦繆為霸者之最蓋論德而不論功其家法有自來矣夫繆公誤用杞子之謀而違蹇叔以至有殲之敗因其三帥喪師辱國夫人而悔之矣惟其悔之而不責於益明視西乞術自己丙之流而深引咎自責增修其德政三敗率用益明而霸西戎此其難者故傳曰繆公之為君也舉人之


周也與人之一也孟明之為臣也其不解也能懼思
也由是觀之秦誓之詞夫豈苟為美而已耶予又觀
繆公事其有出于桓文之上者三晉弔吾之入晉秦
納之矣弔吾背河外列城與賂而不與秦而繆公不
遽怒也丕豹奔秦勸之伐晉則不許及晉饑乞糴則
又輸粟于晉自雍及絳相繼且曰吾怨其君而矜其
民若此者可謂庶幾乎王者之量彼齊桓一怒蔡姬
而遂興伐楚之師晉文之侵曹圍忠其出亡而無禮

何偏也百里奚亡國之俘也繆公舉之牛口之下而登之上大夫之佐終其身倚任而不疑若蹇叔若由余若公孫子桑皆列國之雋也並相與周旋共國政焉若此者可謂庶幾於王者之明彼晉有子犯從於外者十九年矣而其入國也猶投墜于河以為誓齊桓知任一管仲而終不免溺于豎刁易牙開方之徒何明之足稱也楚人滅江秦伯為之降服出次不舉過數大夫諫公曰同盟滅雖不能救敢不矜乎吾

自懼也若此者可謂庶幾于王者之言彼齊魯之同盟舊矣而桓之入也首加師于魯衛晉之宗也衛侯一貳于楚晉文執之且使加酖焉其視繆公哀滅江之心不可同年而語明矣由是觀之繆公惟其能悔過遷善是以平生舉動亦多光明謂其為霸者之最良不誣也秦自繆公而後代有英君以至于始皇卒併天下或謂繆公有遺澤于子孫也亦宜然其後世所由之道強猛恒有餘而仁恕多不足甚則變壞先

王之法流毒四海為生民之一厄使孔子見之必所深痛安得以與穆公者而與之余故曰孔子之錄秦誓也賢穆公以示訓也不計秦之後有始皇者也堯夫進穆公也嘉其德之近于王也慨天下之純乎霸而入于夷者也

丹書圖



武王始入殷訪于箕子受洪範踐祚三日召士大夫而問焉曰惡有藏之約行之得可以為子孫者乎諸大夫對曰未得聞也召師尚父而問焉曰黃帝顙頷之道存乎意亦忽不可得見與師尚父曰在丹書王欲聞之則齊矣齊三日王端冕出師尚父亦端冕奉書入負屏而立王下堂北面立師尚父曰先王之道不北面至西行折而南東面而立師尚父西面道書之言曰敬勝怠者吉怠勝敬者滅義勝慾者從慾勝

義者凶凡事不強則枉弗敬則不正枉者滅廢敬者
萬世王聞書之言惕若恐懼於席四端於机於鑑於
盥盤于楹于杖于帶於履屨於豆觴於戶牖於劙弓
矢皆為銘微焉

上古初無文字庖羲畫卦及先後天圖河洛圖書即
文字也故後世雖有文字之傳而圖象不發武王受
洪範于箕子乃有九疇圖受丹書于太公世止傳其
文耳圖則未之覩也近王欲立氏攜丹書圖示予謂

關中舊傳此圖象一展閱之令人悚然懼欣然喜蓋不待誦其全文觸目假來受益非淺淺矣夫圓天象也方地象也黑白晦明之象也人心體虛靈洞鑑圓融靡不統括故圓象天色隨感裁決行止疾徐時措合宜故方象地矩與易繫圓神方知其理一也然此心在中敬則昭明澄徹急則晦蒙窒塞故曰敬勝怠者吉怠勝敬者減事物應感義則正明斷制欲則叢棘桎梏故曰義勝慾者從慾勝義者凶是方圓即中

外體用寂感之分黑白即善惡邪正禍福之辨所謂
藏之約行之得可以為子孫恒者何簡明親切一至
此也書曰人心惟危道心惟微又曰作德心逸日休
作偽心勞日拙先後一揆有自來矣但此心發與未
發分象方圓豈判然不相合哉亦惟觀象天地斯得
之矣彼天之圓包乎地外地之方奠於天中天體太
虛而天之氣則充貫乎地凡萬類網繩發生于地者
皆天之氣也乾統天坤順承天乾坤一一即心之象

也此心渾淪太極莫知端倪應幾變化各止其所未
應事非先既應事非後寂然不動非局于內感而遂
通非滯于外顯仁藏用常明常覺要在得心忘象聖
訓躍然常在心目間矣易曰敬以直內義以方外敬
義立而德不孤孟季子問公都子曰何以謂義內也
曰行吾敬故謂之內也觀其會通列聖豈欺我哉

圖書編卷十